


colorchecker CLASSIC



x-rite

mm


0 cm 1 2 3 4 5 6 7 8 9 10 11 12 13 14 15 16 17 18 19 20

11


LA MONARCHIE AFFLIGÉE


1649

REGLÉE










M. 13,514.

Cat. Moreau,

n. 2486.



LA MONARCHIE 44

AFFLIGÉE,

Avec ses Consolations Politiques
& Chrestiennes.

A Monseigneur le Prince de Conty.



A PARIS,

Par ROBERT SARA, rue de la Harpe,
au Bras d'Hercule.

M. DC. XLIX.

182

LA MONARCHIE

AFFLIGÉE.

Avec les Consolations Politiques
& Chrétiennes.

de M. de Saligny le Prince de Conti.



A PARIS,

Par ROBERT SARA, rue de la Harpe,
au Bas d'Hercule.

M. DC. XLIX.



LA MONARCHIE AFFLIGÉE,
avec ses Consolations Politiques & Chrestiennes.

A Monseigneur le Prince de Conty.



ONSEIGNEUR,
Voicy des cœurs oppressez qui attendent de
Vostre Altesse l'appuy & la consolation qu'ils
ne peuvent pleinement recevoir que de vostre
vertu; ce sang des Roys qui bouillonne dans vos
veines assure nos craintes, & nous fait esperer le calme dans
le pitoyable desordre du temps; ce beau visage qui nous sert
de caution pour les belles resolutions de vostre ame, a aussi at-
tiré nos zelez mouvemens; si bien que cette florissante, & af-
fligée Cité attend ses plus hautes consolations de vostre sage
& judicieuse conduite, MONSEIGNEUR; la paix & l'v-
nion se verra bien tost concluë avec le retour d'un Monarque
Triomphant au grand contentement de tous les bons Fran-
çois; nos armes apres cela feront des conquestes sur les Infi-
deles, le frere & l'amy vengeront esgalement les outrages de
leurs agresseurs, & cette belliqueuse Nation que nul ne peut
surmonter, n'agira plus à la destruction de ses mesmes forces.
Autrefois les femmes Sabines empescherent les efforts des
Romains: Mais nous avons plus d'advantage à present; ce ne
sera point l'infirmité d'un sexe larmoyant: Vn Heros prendra
un glorieux & diuin ascendant sur les volonteز alterées pour
en faire reüssir des saints accommodemens, qui consolans
nos legitimes, & trop longues allarmes, iamais la France n'a

esté plus glorieuse. Toutes les nations la craignent & la reue-
 rent, elle possède vn Roy de miracle, qui promet tout ce
 qu'on peut souhaiter de grand & d'excellent. Vn Duc d'Anjou
 qui partage avec sa Maiesté les qualitez admirables d'vn Prin-
 ce tres-accomply, vne Reine pieuse, sage, liberale, & chari-
 table, & qui n'estime son regne que pour en acquerir vn au-
 tre dans le Ciel plus ferme, & moins sujet aux accidens de la
 fortune; son humilité n'a iamais retiré son oreille non plus
 que sa compassion des gemissemens des miserables; si bien
 que dans ce commun malheur, le merite de cette grande
 & deuote Princesse sera d'vn prix inestimable deuant celuy
 qui penetre les interieurs innocens. Cet Estre infiny l'a cou-
 ronnée, sans doute, d'vne double couronne, l'vne est d'or, &
 l'autre d'espines: car c'est dans les traueses, comme l'or dans
 la fournaise, que le pur est separé de l'impur, & i'estime que
 prendre des sentimens contraires, c'est imiter les voisins las-
 cifs de Lot, qui vouloient corrompre la pureté des Anges. Il
 ne faut pas iuger les pensées par les euenemens, puis que le
 Maistre des destinées en ordonne au gré de sa Prouidence, &
 il ne tombe pas vn de nos cheueux que sa sagesse ne leur ait
 prescrit leur cheute, nos attentes ont d'ordinaire des succez
 differens, parce que l'aduenir est dans la dépendance eter-
 nelle, c'est ce que nous deuons croire avec fermeté, & que sa
 Bonté donnera vn bon conseil à nos Superieurs, avec l'amitié
 & la paix dans leur souhaitée intelligence. Son Altesse Royale
 qui est vn des puiffans appuis de cet Estat, avec Monsieur le
 Prince, ce Dompteur des Espagnes, ce Foudre de Guerre, &
 ce Mars de nos Armées, ne pourront iamais mesurer leurs
 espées à la vostre. Non, MONSEIGNEUR, c'est ce que
 Dieu ne permettra pas, si luy plaist, il n'est pas iuste de faire
 ces

ces funestes métamorphoses de changer nos boucliers contre
des armes fratricides, homicides, & parricides. Il ne faut pas
pleurer avec Dauid la prise d'Absalon; tant de braues Capi-
taines qui ont remporté des victoires sans nombre sur les
ennemis de l'Estat, se verroient-ils forcez de s'esprouuer con-
tre les genereux & puissans compagnons de leurs victoires?
MONSEIGNEUR, c'est à quoy vostre Altesse doit opposer
les dignes effects d'un genie incomparable, que le sang Royal
des Heroïques & genereux Bourbons, reste pour la seureté
d'un trosne magnifique, & que la sagesse que l'Eternel a com-
muniquée à cette sacrée Race, ne soit pas au prejudice de nos
vœux & de nos esperances, inutile au repos public. MON-
SEIGNEUR, nos Autels fument des Encens donnez au
Seigneur, il nous fait voir sa Bonté dans son exposition sa-
cramentaire, pour oster de nos fureurs les excez qui l'offen-
sent. Son amour veut esmouuoir le nostre, & c'est à nos re-
pentances de luy demander misericorde. Nous sommes des
Niniuites criminels, nos larmes ne peuuent effacer nos cri-
mes: mais nous esperons que vostre pieté sera le milieu entre
nos miseres & leur allegement. Nous ne scaurions obtenir de
victoire qui ne soit fascheuse, aussi la demandons nous moins
qu'une Chrestienne paix; tout le monde crie, Viue le Roy,
& nos Princes, sans pouuoir faire de distinction dans un si
triste partage. MONSEIGNEUR, les peuples sont ravis
d'obeir à vos ordres; mais i'ose vous dire qu'ils ne le feront
pas peu d'accompagner la Cour à l'Autel de la Vierge, pour
y chanter un *Te Deum*, en action de graces de nostre deliuran-
ce: ie dis deliurance, puis que nous sommes dans une funeste
calamité, transis de tristesse & d'horreur par la consideration
de l'estat present. Plaise à la diuine Bonté d'inspirer un mou-

uement salutaire à nos Maistres. Vostre Altesse a droit de
 souueraineté partout où vostre nom & vos habitudes trou-
 uent des ames équitables. Pallas vous a donné ses sciences, sa
 douceur, sa modestie & sa prudence: mais il faut que vostre
 Altesse luy arrache son Oliue pour en faire le cher obiect de
 nos plus durables contentemens. MONSIEUR, lors
 que Dieu monta au Ciel, il laissa la paix à ses Disciples; à son
 exemple procurez-là, si vous plaist, avec ce grand Duc de
 Longueuille, & le reste de vostre Martiale Societé, à des peu-
 ples affligez. Que ce triste Bourgeois qui paroist sous vos ba-
 nieres reprenne son employ, qu'il contribue ses fidelitez &
 son industrie à l'embellissement & à la grandeur de ce Royal
 séjour, & que tout content de se descharger du pesant fardeau
 de ses armes, il en ignore pour iamais l'usage, se resioiissant
 dans sa Chrestienne famille de n'auoir plus de monstres à
 combattre. Viue le Roy, la Reine, & nos Princes; viue la Iusti-
 ce & l'Ordre du Royaume; que la souueraine Cour de Parle-
 ment estant l'organe de nos Rois, & l'interprete de leurs de-
 crets soit de mesme la dispensatrice de nos loyes & de leur du-
 rée, & qu'estant les Soleils de nostre Monarchie, ils dissipent
 sans passion tous les nuages qui nous enuironnent. MONSIEUR,
 cet auguste corps se trouue agreablement animé
 par ce puissant esprit qu'ils admirent dans vos raisonnemens;
 si bien que mon zele tres humble ne cesse de vous considerer
 comme l'Agent impeccable & vniuersel d'une Paix generale.
 Fasse le Ciel que nous en puissions faire retentir les acclama-
 tions iusques aux voutes azurées, & par tous les lieux qui at-
 tendent leur prosperité de nos dissensions, & que nos cœurs
 attachez à vne recognoissance deuote & fidele, nous puissions
 le reste de nostre vie donner tous ces momens au culte diuin,

& au respect passionné des Puissances dominantes, temporelles & spirituelles, & vostre Altesse par expres, M O N S E I G N E V R, comme l'astre fatal qui fera prosperer nostre repos en nous comblant par sa conduite lumineuse, de felicitez & de douceurs, au delà de nostre espoir; & comme Dieu fera briller sur vostre excellente personne des benedictions & des ioyes, à preuue de toutes iniustes conspirations, il vous fera cognoistre le veritable zele que ie vous ay voüé en qualité,

M O N S E I G N E V R,

De Vostre Altesse,

La tres-humble & tres-obeïssante Seruante,
S V S A N N E D E N E R V E Z E.



De Votre Altesse,

Laes humble & tres obillante serua
SVAANNE DE NELLE

